



Eindredactie: Gré van der Veen.

1.6.88

* **Woorden....**

Woorden, woorden, woorden... het al ais ain oet Engelaand schreven en prompt werden dat gevleugelde woorden. n Ander Engelman is Thomas Hardy, ook n schriever. Nait da'k ter n bult van wait, mor och, waarom zol ien zo'n Grunneger rubriek nait ais ain van aander kaant Noordzee nuimd worden; steek je wat van op.

Thomas Hardy het ien n bouk ais dizze zin opschreven dij veur gonnent ook gevleugeld worden is: Dialect-woorden, dat binnen kenmaarken van n daaier veur ain dij deur en deur fersounlek is. Zeg mor gewoon dat dialect-woorden t gebèlk van n daaier is. En dat is ook zo, ie kinnen t verschil zomor heuren tussen dialect en „toal”. Huif je haildaal gain oplaaiden veur had hebben, elk ken t onderschaaid tussen n mensk en n daaier.

* **Kou**

Ien Engelaand zeggen ze tegen n koubaist „kou”, ook Thomas Hardy dee dat. Ie heuren t wel, dat heurt veul menselker as ain of aander Engels dialect dat „koe” zegt. Vrezelk, „koe”: platter as plat, ièlk gebèlk.

Ien Duutslan kin je t ook zo heuren wat fersounlek is en wat nait. „Keze” zeggen ze doar hail netjes en dat is veul mooier en verzorgder as n Grunneger dij ien zien dialect „keze” zegt. Nait om aan te heuren, kéze!

Vooruit, Frankriek kin ien ain boksembaand mitnomen worden.

„La piep”, zegt doar ain dij netjes sprekt tegen dat ongezonde rookapperoat, dat wie „piep” nuimen en dat heurt vot al slim maler.

* **Raaiske**

n Luk raaiske noar t boetenlaand brengt joe n bult kennis aan. Mor dat haar wie ien ons aigen laandje ook te waiten komen kind. Zeg nou zelf, heurt joe ons woord „bevuiln” nait veul raauwer, grovver, lèkker tou as dat deur en fersounleke Hollandse „bevoele”? t Betaikent t aigenste, mor t klinkt vot veul aans en mooier as je t ien n taal zeggen. Of omgekeerd: hou netjes en verzörgd heur joe t nait tou as ain op zien ABN's zegt van „bevuile”. Ons 'bevoeln' is toch rondweg maal ien vergelieken doar mit? Nee, om veur de leste moal ien dit stukje te laigen: Thomas Hardy haar haildaal geliek.

Woorden, woorden, woorden.... Houveul woorden binnen der aigelk? Dij vraog mag je nait stellen: t antwoord is te stoer. Kiek, as ie vraogen zollen, houveul woorden der ien dit stukje stoanen, din schat ik (ook al bin je nog mor haalfweg) dat is 624. Maag vaaier of vief meer of minder wezen, mor om dij gooi is t. Mor houveul Grunneger woorden der binnen... zuik t mor op ien Ter Loan. Doar stoanen zo'n 21.000 ien, mor dat kinnen ook n poar doezend meer wezen, want Ter Loan het ter nogal n rommel-tje ien bezied stopt op steeën doar je heur nait verwachten.

*

* **Zoepmmeelnannieskebrij**

Zo'n aantal van 21.000 woorden is nait n bult, ook nait as wie der veur ale wizzeghaid nog n nustje biereken en zeggen zollen dat ter zeker wel zo'n 30.000 Grunneger woorden binnen. Dat aantal is mor zo klaain, omdat ter oneindig veul woorden meugelk binnen. As je willen kin je toerloos deur nije woorden bedenken.

Ie plakken de woorden ien n volgorde dij ie willen aan nkan-der, ie zetten der meer of minder van t zulde ien, en wat nog t beste zain let dat je deurgoan kinnen mit nije Grunneger woorden te moaken: je magen heur zo laank moaken as je willen. t Langste woord van Ter Loan is: ZOEPMEELNANNIESKEBRIJ, mor ie magen heur langer moaken. En as je t nou nog nait loven willen dat ter ontelboar veul woorden binnen: elk getal is n woord, dus der binnen minstens zoveul woorden as der getallen binnen.

* **Sammemiemoep**

Hou older of je worden, hou wieder je tellen kinnen, hou meer woorden of je leerd hebben. Hou older, hou knapper? Wait ie wat ter noa n miljoun komt, miljard of biljoun? Wait ie wat meer is, triljoun of triljard? Bestoan ze baaident? Ook al weer onzin dij vraogen, zukswat heb je (aigelks) nooit neudeg en dus ken je dij woorden nait.

Hou older, hou knapper? Perbaaier ais as n spultje nije, roare woorden te moaken. Zel joe nait touvalen, zukswat kinnen leutje kiender veul beter as heur ollu. As je older worden, leer je onder ander zo'n stukje „toalcreativiteit” òf. n Grunneger jonkje mouk veur n joar dizze flauw- kul-woorden: sammemiemoep; koenenannikout; koeze- lallipaun. Ik zol der nooit opkomen wezen, en ook nait op dizzent dij t aigenste jonkje loater bedocht het; koranmorentje; laf- fitorium; flingsoen.

De woorden worden aal gewoner, t jonkje wordt aal minder creatief, hai leert aal meer woorden... woorden... woorden.

SIEMON REKER